

Was aber seine gestalt belanget / so ist er von den geschwankten
Cometen einer / diuweit er seinen Schwanz lang vnd breidt nach sich
schlepffet / welcher im anfang / da ich ihn erstlich zu sichte bekam / fast bey
20. Grad sich erstrecket / welches nach seiner Sphaera zu rechen / so hoch
als ich ihn geschicket habe / fast vber die 15. tausent 6. hundert vnd 80.
Meilweges sich belaufft. Den Kopff hat er gegen auffgang der Sonnen
nach dem Südost / den Comam oder Schwanz aber nach dem Nord-
westen gewendet. Seine Farbe ist röthlich mit etwas dunckelbleicher
Farbe vermischet gewesen / sonder zweiffel von der dicken dichten zusam-
men gepacketen Materien / oder von den Planeten / bey welchen er erst-
lich erschienen / vnd von welchen er ist inflamirt vnd angezündet wor-
den / welche gewesen seyn Mars vnd Mercurius. Denn zwischen diese
beyden ist er erstlich erschienen. Den Martem hat er auff der rechten /
Mercurium auff der lincken Seiten gehabt. Sein Glantz vnd Schein ist
nunmehr nicht so hell vnd groß wie im anfang / darauß zu schliessen / daß er
allbereit im abnehmen sey / vnd nicht mehr so lange stehen wird / wie ge-
schehen. Wie er sich aber in seinem Lauff verhalten / ist augenscheinlich /
vnd darff nicht viel beweisens. Denn er gehet quer vber contra seriem
signorum iuxta motum proprium & directum Planetarum ab
ortu in occasum, auß dem Zeichen Scorpions in die Wage / vnd auß
dem Südost ins Nordwest / doch viel geschwinder wie die Sonne. Denn
da die Sonne alle tage in ihrem signo coelesti vngesehr einen grad fore
schreitet / da gehet dieser Comet täglich vber die 3. grad. vnd also täglich
3. mahl schneller wie die Sonne. Vnd dieses sey nun kürzlich vnd ein-
feltig de motu visibili & apparenti geredet. Nun wollen wir zum
andern von seiner bedeutung auch etwas melden.

Es ist zu allen zeiten von allen Scribenten / beyd New vnd Alte
mehrentheils confirmiret vnd beschlossen / wie denn auch die tägliche
Erfahrung dasselbige bekrefftiget / daß die Cometen allezeit viel Böses
vnd allerley Unglücks mit sich gebracht / vnd nichts anders seyn als
eine brennende Fackel Göttliches Zorns / dadurch vns Gott der Herr
vmb vnser vielfeltigen Sünde vnd Mißhandlung / grosse Straffen vnd
allerhandt Plagen dretet vnd zu verstehen gibt. Darumb sollen from-
me vnd Gottfürchtige Herzen dieselben nicht verachten / vnd in den
Winde schlagen / Sondern dieselbigen für Gottes Ruchte erkennen /
vnd ihn vmb linderung der Straffen mit einem Bußfertigen vnd Gott-
seligen Leben bitten vnd anrufen.

Es sind